

CARNAVALSMENU

Zoer vleisj....

...en dan bedoele veer neet d'n snoenmam, mer 't echte Limburgse Zoer vleisj,... carnavalsvoor bee oetsjtek. Die van de Heemkunde vereiging höbbe uch lekker gemaak met unne kalender Bemelse gerechte, allein waore zee vergete de recepte op de kalender te zette... Daorum zette veer hei onder 't recept veur ech Limburgs Zoervleisj

Ingrediënte:

- 1 kilo runderlepkes of hachee
- 1/4 kilo unne, groof gesnooje
- 2 tot 3 tasse azien
- 2 tot 3 tasse wate
- 4 groffelsnegel
- 1 lawweleerblaad
- 1/2 eetlepel sjroep
- 2 sjiive peperkook
- 1 theelepelke sókker
- 10 peperbölkes
- 2 steke magrien ("steek"= 25 gram)
- get zaait en get peper

Recep:

Vrief 't vleis in mèt zaait en peper en snij 't in stökker vaan oongeveer 3 bijj 3 centimeter. Marneer 't minstens 24 oor in d'n azien gemink mèt 't water, 't zaait, de peperbölkes, 't lawweleerblaad en de groffelsnegel. Smoor in 'ne braodketel de unne in boter goudgeel en lègk ze eve opzij.

Hool 't vleis oet de marinade, druug 't en bak 't in diezelfde boter broen. Doeg de unne bijj 't vleis en zoevæöl marinade tot 't vleis zjus onder steit. Reur de sjroep dedoor, de fien gemaakde peperkook, de sókker en laot 't vleis op e lieg turke pruttele tot 't gaar is, d.w.z. tot 't bekans oeterein vèlt. Op smaak aofmake mèt peper en zaait.

Laot 't uuch smoke!



De Gouwe Kromme



De groete carnavalsorde van de Kopere Kromme, de oondersjeiing veur groete verdeene steur de gemeinsjap Bemele en umsjtreke, weurt dit jaor towgekind aan:

Paul Nieuwenhuis

In de ierste plaats veur al 't wèrek dat heer verriech veur en in de kèrrek (same met Marleen), niks is teveul meujite, regele, opruime, zinge... heer deit 't allemaol.

Mèr zeker och veur 't gooij en väöl wèrek dat heer deit veur de Heemkunde in Bemele. Boe heer zörreg veur e bitsje orde bee die ongeregeldje bende...

De "dames" van de hoeskamer

Met väöl inzat mèr och met väöl plezeer zurrege de dames van de hoeskamer d'r al e paar jaor veur dat de hoeskamer bezoekers (geer zeet dao allemaol welkom) unne fijne en gezellige middag höbbe in Bemele. Of dat noe is met kiene, unne sjpelkes middag, lekker ete, Sinterklaos, Carnaval, of gewoen lekker e pötsje kaarte of gezellig same kletse onder 't genot van 'n tas koffie of e glaeske wien...

Bee Louk of in de kantien, en, es dat neet maog dan komme ze gewoen bee de luij aan de deur um hun 'n hart onder de reem te sjteke.

Veer houpe dat zee weer sjnel aan de geng maoge.

ADVERTEERDERS

Onderstaande bedrijven steunen de Carnaval in Bemelen, steunt u hen ook?

Tom van Leeuwen - Café 't Plateau - Henry VIII pub - Praktijk voor mondgezondheid Maastricht Christel Schlosser - Gastrobar Die Twie - Upstage, Podium verhuur - Dierenkliniek Maastricht - Van Motman, staalconstructie / montage / installatie - Van Gregor, interieur & verbouwing - Metaaldraaierij Lambert Thomassen - Thomassen Plant protection - Hotel Brasserie Bergrust - Dierenspeciaalzaak Conjarts - H&R Andriën, landschapsonderhoud Loonwerk - JD Electro Duykers BV - PassieFlora Hoveniersbedrijf - Heijnens Installaties - Camping Vinkenhof - Nijskens Grondwerken - Crijns Banden - Alere Hair&Nails - Face-it Beauty - Bèr Huynen, Tuin, Park, Landbouwtechniek - MVKVS Martin van Kempen, VAT services - Klinkers, groothandel in zoetwaren - Paul Bovens, Architectural design - Mourmans Infrasupport - Gezondheidscentrum Bemelen - Plus Kaufmanns

De Gekkegazet

Sinds 1970
Carnavalsgazet van CV de Berggeite 2022

De geruchtemeule....



Beginne met aafvalle

Un nuij jaor is de tied um gooij veurnummes te maken. Minder dreenke, mieë bewaege en aafvalle, beveurbeeld. Ouch de gemeente Mergraote haet gooij veurnummes gemaak... Nei, neet mieë bewaege, want de gemeente is al jaore neet in bewaeging te kriege. Nei, ze wille aafvalle, of beter gezag: aaf van 't aafval. Zoe höbbe ze 't plan opgevat um in plaats van eedere twie weeke nog mèr eine kier per maond aafval te kome ophole. Boe geer dan met uuch aafval nao tow moot? Dao höbbe ze 'n oplossing veur gevoonde: dat geit gewoen de groond in. Dat kleenk hiel modern, mèr volges os dege de luij dat vreuger och al... Mèr good, de gemeente wil daouveur 'nen ondergrondse aafvalcontainer plaatse in Bemele. Allein wiste ze neet precies boe. Bee de glascontainer zou hiel logisch zeen, mèr d'r waore luij die dao lever 'n leuk bénkske zaoge, en dao wilste dan neet zoe'ne container neve höbbe sjtoon. Dus woort 't plan um de container dan mèr in de Keersewei te plaatse. Boe? Geer raojt 't al: vlak neve 't bénkske dat dao sjteit. En och vlak neve de gedeenkplaats veur de Kromme. Dat kin netuurlik neet, dus geit 't veurluipig neet door. Veurluipig... Mèr noe sjene d'r geruchte te goon dat de gemeente de aafvalcontainer wil plaatse op de plaats boe vreuger och 't aafval oet 't dörrep al woort gebrach, hauverwege de Bemelerberg. Dao mot volges os toch al hiel get aafval in de groond zitte. En es Wiel sjtraks zien functie es wethouwer neerlègk, kin heer toch nog veur de gemeente blieve wèrreke en 'n bitsje towzich houwe op dae container.

Dan kin heer behalve de oudste wethouwer och nog de oudste milieuparkbeheerde weure. D'r is bee häöm in eeder geval genog plaats um 'n milieuperron aan te lègk, en och nog verkiersveilig. De reije veur zoe'ne ondergrondse container is natuurlik besjparing. Zoe hoof de vrachwage neet mieë um de twie weke nao 't dörrep te vaare, dus 25 kier per jaor, mèr nog mèr 12 kier. De ondergrondse container weurt dan waal eedere week laeg gemaak, dus dat is 52 kier. Dat is dus 'n besjparing van... Hè, wach eve.....? Wie de hermenie hoort van zoe'ne ondergrondse container zaoge zee och waal get in zoe'n oplossing veur 't oud papier. Sjtèl diech veur, nog mer eine kier per jaor oud pepier ophole... Veur de mieste luij in Bemele zouw dat och 'n oplossing zeen, die hoove dan neet mieë eedere zaoterdig zoe vreug oet bëd um 't oud pepier boete te zätte. Veur sommige Bemelaere geit 't ondergronds goon nog neet wied genog. Die zaoge de glascontainer 't leefste gáns onder de groond goon, zoedat geine zouw zeen wie groet hun drankprobleem is es ze dao weer met 'ne kofferbak of kruikar (Hè Yentl en Britt?) vol laeg wienflesje sjtoon... En noe veer toch allemaol ondergronds goon in Bemele: moch de aanbouw van 't gemeinsjapshoes toch nog probleme oplievere, dan kinne ze veur de oetbreijing veur de hoeskamer och nog altied ondergronds goon. Te doonker, zègk geer? Dat is zoe opgelos, want tege dae'n tied zal de sfeerverlichting die de gemeente eeder dörrep belaof haet veur Keersjmis toch eindelik waal gelieverd zeen...? Veer weite in eeder geval wae in maart 2022 waal geit aafvalle. Dan zeen toch de gemeinteradsverkezinge? RD4, maoge dees zèk och bee 't rest-aafval?





W Is geer dat...?

Netuurlik haet de redactie och dit jaor weer heur oer te luustere gelag in Bemele um uch de letste roddels te kinne vertelle. D'r is netuurlik neet zoeveul gebeurd dit jaor mer toch.... En es 't neet woer is, dan höb geer 't neet van os...

W Is geer dat...?

- de hoeskamer noe dèks in de kantine van de voetbalclub is te veende en dao noe ouch aanpassingen zeen gemaak veur seniore?
- es d'r noe auch nog handvatte kome in de douche dat Rob Andriën dan nog minstens 10 jaor mèt kin voetballe?
- De café noe is euvergenomme is door Peter, Jan en Pilippe, Mer veer dan neet sjnappe woerum zee zich Die Twie neume en neet Die Drei?
- Dat "Maison Sjeng en de Boer" auch un optie waor geweis?

W Is geer dat...?

- De Nuije kalender van de Heemkunde Bemele geit euver Bemeler gerechte, bakke en koke?
- Pierre Oberjé de veurkant van dae kalender haet gehaold met zien groete Waffel(e)
- dat tössje alle lockdowns door de dames weer 'n geweldig fees höbbe geregeld in 't gemeinschapshoes woebree ze in eine Battle of the Sexes verkleid waore es Tarzan en Jane umdat dat 't thema waor?
- veer weite dat de dames in Bemele gek zeen op unne Tarzan?
- dat veer noe al oetkieke nao de volgende editie umdat ze dan es thema "Adam en Eva" höbbe?

W Is geer dat...?

- Rogier de Ridder 'ne groete den gevoonde had, zoe mèr, op de Zjwarte weeg, en dae met nao hoes haet genome?
- dat veer de joonheid advisere um es zee weer ins eine den goon haole, dae mer good vas te legke veurdat dae sjtraks ouch in de kom sjiteit?
- dat d'r in 2021 weer hiel get keender zeen gebore in Bemele, en dat de mieste allemaol maedskes zeen?
- dat alleein Peter Beaujean 't blykbaar vaerdig kreig um jungskes te fabricere? En dat heer zoe zörreg veur 't ewiech in 't Dörrep?
- Dat veer dat al ierder veursjpèld houwe in us gezetsje (en dat dat waarsjijnlik aon dae paol van Peter ligk?)

> degekkegazet Zaterdag 19 februari 2022

- datste d'r toch neet aan mos deenke dat die vrouwlijj sjtraks allemaol met eine van Beaujean thoeskomme ...?
- Dat ein van die maedskes gebore is es echte Oeteldonker? En dat veer dat allemaol prima veende, zoelang 't mer geine Sjeng is...
- W Is geer dat...?**
- Dat wandelaers tegewoordig ouch bee Vers Voordeel Vaessen terech kinnen veur e bruudsje en koffie?
- Dat ste dao dus eigelik terech kins veur Ferse koffie en fers belagde bruudsjes?
- Dat veer noe ouch unne sjiltetuïn höbbe in Bemele op de Zjwarte Weeg?
- Dat zee dao neet väöl ruchtbaarheid aan höbbe gegeve, en 't missjen dus waal sjil wilde houwe?
- Dat in de keersjewei 't tegeneuvergesjtelde ligg van ;ne sjiltetuïn?

-en dat dat zeker zoe is es dao van de zomer weer 'ne barbecue weurt gegeve bee Danny en Joyce... |

W Is geer dat?

- Dat d'r in 2021 twie kier nao Banneux is gewandeld?
- Dat d'r twie luij waore die mèr veur de helf höbbe geloupe umdat ze pijn aan de veuj houwe?
- Veer Peter Ladeur en Martin Lammers beloaf höbbe um dat geine te vertelle.

W Is geer dat...?

- Dat, alhoewel d'r veurig jaor geine optoch waor, toch eine 't record gevestigd haet van de kortste en sjnelste optoch... dat ouch dae Bergrunner weijer onbekind wil blieve, mèr dit jaor unne aanval geit doen op zien eige record?

W Is geer dat...?

- de hermenie aafgeloupe jaor toch eindelik weer uns 't dörrep en ouch op 't gasthoes haet roondgetrokke?
- dat dat zoe te zeen al lang neet mie gebeurd waor, umdat ze neet echt rechtoet marsjeerde?
- Veer os aafvroege of dat misschien auch aan de tambourmaitre laog?

W Is geer dat...?

- Roy en Bente unne zoon höbbe gekrege en hum **BOR** höbbe geneumd?
- Veer blij zeen dat 't gein dochter is gewoore umdat veer **AREVLE** toch unne gekke naam hadde gevoonde?



W Is geer dat...? Veer noe goon sjtoppe umdat veer niks mie weite en inins zin höbbe in unne pot beer?

> degekkegazet Zaterdag 19 februari 2022

KNVB BLEUS KOMTETIE NUIJ LEVE IN

De voetbalcompetitie haet 't noe al veur 't twiede opeinvolgende jaor zjwoer. Auch de FC Bemele oondervindt dao de gevolge van... Allemaol die sjtrakke aafgetrainde liechame – höb geer waal ins op eine zoondig langs de kant gesjtange bee 't twiede? Dan wèt geer woe veer 't euver höbbecke... - beginne langzaam mèr zeker 'n bitsje te verzakke, En voetballe zoonder publiek, dao is geine bal aan. Veur wae mooste dan juiche este 'n gool höbs gemaak? De zows 'm van d'n ambras nog leever d'r neve sjeete. En sommige zeen dao auch al mèt begós... Mèr de KNVB haet planne um de kompetitie nuij leve in te blooze. Aanvankelik naome ze dat get al te letterlik, en wilde ze de veldcompetitie goon vervange door 'n blaosvoetbalcompetitie.

Sjport

Dao leek waal gèt veur te zègke, umdat de mieste amateur-voetballers es fervente leefhöbbers van de derde hèllef euver 'n prima getrainde blaos besjikke. Mèr umdat geine zaot te wachte op 'n gael kaart, en umdat geine zin haw um op 'n naat veld te sjpele, höbbecke ze 't gebruik van alcohol onder de wedstrijd verbooje. Probleem: de KNVB haw d'r – sjtom, sjtom, sjtom... - gein rekening mèt gehauwte dat sjpelers zich noe al véür de wedstrijd fleenk mood in ginge dreenke. Dus sjtong eederein bee de wedstrijdje mèt eine kegel van heij tot dao aan de taofel, en zaogste vanwege de alcoholdampe al gauw geine bal mieë...

Gein blaosvoetbal, dus. Wat ze veural bee de hermenie van Bemele jaomer voont, want dao hawwe ze auch gère weer ins get te blooze gehad... Dan mèr taofelvoetbal, dachte ze bee de KNVB. Dat wèrrekde al väöl beter. Allein bleek dat neet álle voetballers van de FC Bemele dao technies mèt oet de veuj koste. Sommige hawwe net zoeväöl bal-geveul in hun vingers es in hun bein. Wienig, dus. Veural de sjpelers van 't twiede zaogste regelmaotig euver de sjtange sjtruukele.

De KNVB is noe op zeuk nao meugelikhede um de competitie veur amateurs te laote sjpele via de computer. Dao veur weurd 'n variant van 't voetbalsjpel F.I.F.A.-21 ontwikkeld: B.I.B.A.-11. Of, wie ze dat bee de FC zègke: Balle In Bemele Is... De rès maog geer zèllef invulle.



Sjport kort: prinses Monica aon 't traine veur de Iron woman



Met trots presenteren veur uch de nuij hit van Dyanne Sleypen, 't nachtegaaltje van Bemele

Cultuur

Op de muziek van "hett kleine café aan de haven" tekst: Die v.h. Gezetsje

Dao in die klein Gastrobar aan de kerrek

De avendzon vèlt euver weien en sjtraote,
De gouwe zon zak in Mestreech,
En luij die hiel sjnel noe de sjtraote verlaote
Hiel Bemele lòp dan weer leeg
De zuus geine hoond mie gein kip is te zeen en,
op sjtraot zuuste gein berreggeit..
't D'orp oetgesjtorve, toch kleenk d'r muziek oet un deur
die nog wied opesjteit

Refrein

Dao in die klein Gastrobar aan de kèrrek,
Dao ete luij of dreenke get aan 't buffet
Dao in die klein Gastrobar aan de kèrrek
Dao itste sjiek en neet gewoen e frietsje mèt

Bove aan die trepkes, krijgste lekker hepkes

Gein frikadel dao oet de moer

un lekker satéke, un hinnevedeike

't Is net maison Sjeng en de Boer

"t Is veur eederein, riek of erm, koud of werrem,

Croque mesjeu, un salade en mie

Zelf d'n hoond, hiel gezoond krig dao un bekske water

Jao, tis dao hiel good bee die twie

Refrein 1x

De Burn-out en stress jao die zeen tusse twie glaze beer
opgelos veur altied

Op de rand van 't beerviltsje krijgste de rekening, jao de

bès waal get kwiet

Mèr behalve get lekker te ete krijgste dao veural ouch un

hiel good glaas beer

De luij zeen dan weer hiel gelukkig gewoen, ja die höbbecke
dan hiel väöl plezeer,

Refrein 1x



Interview prinses Monica

Veur os interview blieve veer dit jaor kort bee hoes. Alhoewel, inmiddels haet Prinses Monica heur residentie elders. Normaliter zouwe veer heij 'n aafscheidswoord van de prinses doen, mèr 't zuut d'r nao oet dat häöre termijn wéér mèt 'n jaor verlengk weurt.

Prinses Monica, zieër doorsluitige hoegheid, geer gaot noe 't derde jaor in es prinses van de Berggeitte. Ze zègke waal 'zoen gooij höbbe veer noch noets gehad', mèr 't is noe ierder 'zoen gooij höbbe veer nog noets zoe lang gehad'... Wie vind geer dat zellef?

'Jèh, wie ze miech in 2019 kaome vraoge dach iech dat iech 'n jaarkontrak kreeg, mèr dat is noe al veur de twiede kier verlengk, dus iech deenk dat iech good in de sjmaak val bee de raod van ellef.'

Dat vreug netuurlik waal 'n behuurlike insjpanning. Veer zeen uuch regelmatig langs renne, dat is zeker um in vörrem te blieve?

'Nou, iech moot waal blieve loupe, want iech moot netuurik waal eeder jaor weer in dat klèdsje passe. Iech gaon miech ech neet eeder jaor 'n nuij prinsessekleid koupe.'

Is 't neet èreg um drei jaor lank prinses te zeen van de Berggeitte?

'Nou, nei,, iech vin 't prima. Mèr d'r zeen luij die d'r neet zoe blij mèt zeen.'

Dat kinne veer us neet veursjtelle, wae dan?

'De oud-preense. Die sjtoon al twie jaor te wachte tot ze miech oet kinne kleije...'.

Drei jaor... Este drei jaor bee de sjutterij keuning bès, dan weurste vanzelf keizer. Waor dat mesjiens och gët veur de carnavalsvereing?

'Jao dat zou waal leuk zeen, nao drei kier prinses, dat iech dan keunigin zouw weure of zoe. Iech vraog miech trouwes och aaf, es iech drei jaor achterein mèt renne 'ne wisselbeker win, dan maog iech dae beker houwe. Zou dat mèt de scepter och zoe zeen...?'

Veer höbbe noe drei kier 'n prinses gehad, en ein prinses drei kier... Wie wèlt geer herinnerd weure sjtraks, es geer moot aaftreiye?

'Netuurlik es de langst zittende prinses. En veur de jubileumgallerij es Prinses Monica de ierste, de twiede én de derde...'

Mens en natuur

De baron van Bemele

Mèt al die preense en prinsesse zit Bemele tóch al goed in de adel, mèr noe höbbe veer dao nog mie adel bee gekrege: 'ne echte Baron. Um de kudde mergellandsjäöp op peil te houwe, haet 't Limburs Landsjap beslote um 'n ram oet Holland in te laote vleege mèt de naam Baron.

Noe sjnappe veer och waal: este veur 'nen houp naokomelinge wils zörrege dan zitste mèt adel altied good. Kiek mèr ins nao ozzen ouwe prins Bernard of nao dae van Belsj.... Die waore d'r neet vies van.

Mèr mot dat noe persé 'nen Hollender zeen? Höbbe veer heij zèllef geinen adel, of op z'n mins eine dae de sjäöpkes op 't druge haet, door de wol gewasse is en d'r op los kin ramme in plaats van get sjaopachtig te kieke? Volges de herder is 't probleem dat de mieste ramme heij in 't zuije miestal lam zeen...

Veur moote waal touwgeve, noe 'n paar weke later, dat dae Baron d'r gein graas euver haet laote greuje. Es d'r ein sjaop onder de ram is dan volge d'r mier, zulle veer mèr zègke... 't Doorde neet lang, of alle sjäöp houwe un blauw vot... Dat keump volges de herder door 'n gekleurde blok dat aan de ram hingk, zoedat ze kinne zeen welk sjaop bezeuk haet gehad van de Baron. Op os vraog woerum d'r dan och 'n paar sjäöp bee leepe met 'n greun vot bleek dat de knech van de herder 'ne nuije euveral haw van de Aldi. Die mooste blykbaar iers 'n paar kier wasse veurdatste ze aantrèks, anders geve ze nogal aaf...



Gezondheid



CAR(A)NAVAL OF COR(O)NAVAL?

Umdat d'r altied mieér veroontröstende beriechte binne kaome euver depressieve geveules bee de Berggeitte en Bergbök vanwege 't coronavirus en 't obbenufts sjrappe van de vastelaovend, haet de redaksie van dees gezèt besloote te raoje te goon bee eine deskundige op 't gebied van de psychische verwèrking van vastenaovend, mèt name op Asgoonsdig, dr. Frens de Kater. Heer is aafgesitudeerd in de geistelike gevolge van 'n chronisch gebrek aan beer en polonaise, en gespeesjalizeerd in de oontwènningsversjeinsele bee acute hoempapa-tekorte.

Dokter De Kater, bedaank dat geer os dit intervjoew wilt geve. Veer weite wie drök dat geer 't höb es lid van 't vastelaoves-O.M.T. (Onnuuzel Moppe-Tappers).

'Jao, 't zeen drukke tije... Al die virusse en al die variante, veer kinne 't zoe noeën dan neet bethovenwe. Mèr iech kin uuch gelökkig laote weite dat veer nao oetveurig oonderzeuk de oorzaake van de coronavals-dip bee de Berggeitte höbbe kinne achterhole. 't Geit um 'ne nuije variant van 't virus, de P.I.L.S.-variant. Dat sjteit veur Problematies Irritant Lauheid Sydroom. En 't keump d'rop neer dat luij ummer mieér gebuk goon onder 't gebrek aan lauw vastelaovesbeer. Bee sommige variante keump dao nog 'n beewèrreking bee, die veer D.D.N.D.A.T. höbbe geneump. Dat kleenk ingewikkeld, mèr 't beteikent dat luij 't geveul misse van De Daag Nao De Aovend Deveur



Geer kint dat waal, es vastelaovesvierders. En este dat geveul kwiet bès, dan vèlse dus in 'n gaat.'

Dat is dus de oorzaak van de coronavals-dip. Mèr zeet geer auch al get wèjjer gekome mèt 't zeuke nao 'n oplossing?

'Veer höbbe 'n paar väölbelaovende sjtappe gezat... Mèr veer zeen d'r nog neet gans oet. Wat vas sjteit, is dat 't regelmaotig hoole van eine Betrouwbare Ergernis Eliminerende Re-booster (B.E.E.R.) 'n gunstig effect haet op 't trögkdringe van 't virus, en de ergste versjeinsele van de coronavals-dip in eeder geval tempert. Veur dae booster hoofste neet na 'n vaccinatiepunt, dae kinste gewoen thoes inneume. Mèt mate, zoewie ze dat op z'n Hollands zègke. Mèt vrùn, dus. Mèr neet mieér es veer tegeliek. Die vrùn, bedoel iech, neet dae booster. Dao maogste d'r gerös gët mieér van pakke, dat versjèrrek 't effect allein mèr. Veer zeen noe trouwes nog aan 't bekiele of mesjiens auch 'n euverdosis van de Wappetige Intelligentie Eliminerende Nao-booster (W.I.E.N.) 'r zelfde effect haet. Mèr veurluipig liek dae allein bee vrowluij te wèrreke.'


Veer huure auch gooi berichte euver ein ander in Holland ontwikkeld vaccin, 't Faliekant Reusachtig Irritante Sokkerwater (F.R.I.S.). Wie deenck geer dao euver?

'Es iech uuch eine goede raod maog geve: begin dao neet aan! Dat vaccin is ontwikkeld door luij die euverduudelik neet sjnappe wat vastelaovend is. Veur echte carnavaliste is F.R.I.S. puur vergif. Dat maak de dip allein nog mèr deeper. De beewèrrekinge zeen déks ernstg: n zoerproumegeziech, sjtieftheid in de bein, sjterk verminderend geveul veur rundjes geve, allergie veur alles woe ander luij mèt kinne lache... Iech zou dao pas éch eine dip van kriege. Eine D.I.P., mèt hooflötters. Iech zékg altied, mèt vastelaovend geldt: Druugkloeterij Is Problematies.'

Höb geer nog eine lètste gooje raod veur luij die 't misse van de komende vastelaovend zoonder al te groete psychiese probleme wille euverleve?

'Iech zou zègke: doorgoon, altied doorgoon. Maak d'r van wat d'r van te make is. Dreenk uuch eine, en blief lache. Dan höb geer oondanks alle virusvariante zeker Geweldig Enerverende Zalig Onnuuzele Onbezorgde Neet Druuge Heerlijke Ech Inspirerende Daag (G.E.Z.O.O.N.D.H.E.I.D.) En umdat 't vastelaovend is: zèt uuch (moond)maske op...'

PUZZEL!



Doot geer met puzzel?

Zeet geer e bitsje 'ne echte carnavalist van 't heuvelland?

Wèt geer de name van de carnavalsvereinginge van de gemeente Eijsde-Megraoote ?

Vul dan de name heij bove in en es 't good is dan versjyne d'r in de grieze vekskes twie waord.

Dis weurt kint geer opsjikke nao carnaval@bemelen.com en dan maak geer kans op e paar sjoen prijs.

Veer verlote oonder de gooij inzenders unne sjpeciale Berggeitte Coronaval 2022 mok en unne sjpeciale unieke

Berggeitte Coronaval 2022 Flesjeopenener !!

- | | |
|---------------------------------------|--|
| 1 Die van Oost Maarland – | 2 Dit waore d'r van Eijsde, van de Blauw,.. helaas ter ziele in 2019 |
| 3 Die van Rijckholt - | 4 Die van heij |
| 5 Die van St Giettere | 6 Die van Breust (Eijsde), helaas ouch ter ziele in 2019 |
| 7 Die van Mheer | 8 Nog mier van Eijsde, van de Roeij |
| 9 Die van Mergraote | 10 Die van tebannet |
| 11 Die van Groessjelt | 12 Die van Ikkelder |
| 13 Weer van Eijsde, opgeriech in 1974 | 14 Die van Noorbeek |
| 15 Die van Sjuelder | 16 Die van Keer |
| 17 Die van Termaar | |



Ouch aan de keender höbbe veer gedach,... zee kinne e leuk preiske winne door oondersjaonde kleurplaat
sjoen in te kleure en un foto daovan op te sjture nao Kleurplaat@bemelen.com.

Sjrief waal eve dudelik de naam en de laeftied d'r bee...



't Zal neet metein eederein zeen opgevalle, mèr d'r is in Bemele veurig jaor 'n belangrike archeologiese ontdèkking gedoon. Op 't Wolfshoes, um precies te zeen. Oonderzeukers van de Studiegroep Onderaardse Kalksteengroeven (SOK, neet te verwarre mèt KOUS, de damesvereiniging Kook Oma's Unne-Sop) höbbe op de binneplaats van 'n boerderij deep in de put gezete.

Veertig maeter deep zeen ze gegange, en toen veulde ze aan hun water dat ze neet mieë weijer kaome. Umdat ze tamelijk oetgeput waore, leete ze ziech weer langzaam oet de put hoole um 't onderzeuk aaf te sjelete. Mèr toen zaog eine van die onderzeukers vanoet einen aughook – beter: mèt 'n sjael oug... - in de zijkant van de put 'n behuurlik gaan wat ze blykbaar in de aafdaling neet in de gate hawwe gehad. Dat bleek bee nader onderzeuk 't begin van eine tunnel te zeen. Dae gangk leep 'ne maeter of twintig deep onder de grond riechting Bemele, mèr toen waore ze gesjtop mèt grave.

De groete vraog: wat waor dat veur eine tunnel? Volges sommige deskundige moote de inwoeners van 't Wolfshoes 'n paar ieuwe geleije dao op zeuk zeen gewaes nao de plek woe ze 't leech aan 't einde van de tunnel koste veende. Dat liek mesjiens 'n gek idee, mèr dao hawwe ze op 't Wolfshoes vreuger blykbaar waal dèkser lás van. Volges medici haet dat waarsjijnlik gèt te make mèt te lang in de weend sjtoon, dao bove op 't Plateau. Neuroloog professor Van de Meule: 'Este dao neet mèt oetkieks, lòpste 't risico dat diech de herses oet de oere blooze...' In eeder geval zeen ze mèt 't wèrrek aan dae'n tunnel gesjtop wie ze d'r achter kaome dat 't leech mèt elke maeter grave auch 'ne maeter weijjerop ging zitte sjeine...

Andere deskundige zeen 't zjus andersum. Volges hun is dae tunnel 't bewies dat de luij van 't Wolfshoes ieuwe geleije hunnen tied al wied veuroet waore. De bekinde archeoloog P. de Fantasticus meinde zèllef dat d'n tunnel waal ins 't begin zouw kinne zeen van wat oetendelik eine metro zouw moote weure, d'n ierste van Europa en mesjiens waal van de wareld. 'Iech vermoed dat ze oeteindelik mèt grave gesjtop zeen wie ze in de gate krege dat 't nog waal eve zouw doore veur d'n trein ootgevoonde zouw weure...'

En dan zeen d'r auch nog luij die meine dat dae put op 't Wolfshoes gegrave is wie de luij op einen dag op die plek eine regenbaog zaoge en metein mèt man en mach begoste te grave um de pot mèt goud te veende. Mèr die meugelikheid neume veer neet serieus. Zoe gek zeen ze zèllef op 't Wolfshoes noets gewaes. Oeteindelik waor 't de historicus W. van Heij tot Gunterae daae mèt de mieës veur de hand liggende oplossing

> **degekkegazet** Zaterdag 19 Februari 2022

kaom. 'Iech deenk dat 't de bedoeling waor um van 't Wolfshoes 'n directe ondergrondse vebeeding mèt Bemele aan te lègke', meint heer. 'Oet de archive blyk dat die van 't Wolfshoes en die van 't Gastes vreuger dèkser gleujetige herrie hawwe. Veer weite neet precies woerum, mèr dat wiste ze zellef waarsjijnlik auch neet. Op 't Gastes kin 't auch hiel hèl weijje... Wie dan auch, iech deenk dat ze van 't Wolfshoes gewoen nao Bemele wilde kinne goon zoonder iers langs die van 't Gastes door te moote.' Mèr woerum höbbe ze dae'n tunnel dan noeëts aaf gemaak? 'Iech deenk dat ze d'r nao deepgravend onderzeuk achter zeen gekome dat Bemele toch waal errreg wied weg waor. Dao kaom bee: ze vroogte ziech auch langzaam mèr zeker aaf wat ze in godsnaam in Bemele te zeuke hawwe.'

Toch is 't idee van die rechstreekse verbinding tusse 't Wolfshoes en Bemele auch ieuwe later nog neet hielemaal vergete. Aafgeloupe naojaor woord 'n nuij poging gewaag, deze kier neet ondergronds mèr wied d'r bove, door de lóch. 'n Groep Verontrustende Plateaubewoners haet toen in 't deepste geheim 'n sjtuk of tien proof-vluchte mèt 'ne helicopter op en neer nao Bemele georganiseerd. Tenminste: ze dàchte dat ze dat in 't geheim dege, mèr ze waore vergete dat helicopters tamelijk gèt herrie make. Dao kaom bee dat ze bee de gemeinte al lang in de gate hawwe dat eine de wieke van de meule op 't Wolfshoes geklawd haw, dus wie die lóch kraoge van die wentelwieke in de lóch bove 't Plateau waore ze behuurlik in hun wieke gesjote. Ze wiste 't al gaw zeker: dit zaakske sjteen... En dizze kier maalden de ambtelike meules veur de verandering 'ns neet langzaam, dus ginge de helicopters oet de lóch en kraog de meule zien wieke trùgg...

Door de loch geit 't dus waarsjijnlik auch neet lukke mèt die rechstreekse verbinding tusse 't Wolfshoes en Bemele. D'r bliif veur wae perseé neet euver de weeg wil umdat 'r lever alle probleme oet de weeg wil goon, eigelik nog mèr een meugelikheid euver: ein kanaal. Dao weurt inmiddes hèl aan gewèrrek. Nei, ze goon neet mieë grave. 't Weurt 'n tilleviez-kanaal. Binnekort weurt vanaaf 't Plateau bee de meule de satellietzender gelanceerd. En dao maoge die van 't Gastes dan neet nao kieke. Lekker pùùuhhh....

> **degekkegazet** Zaterdag 19 februari 2022**oetgelicht**

DIE VAN 't KRUTJE

**Preeens Mark 1 van 't Krutje**

Es d'r éin grupke is in Bemele die neet sjtil höbbe gezete dan zeen 't waal die van 't krutje. Naodat Preeens Lars I in 2020 eindelik ziene scepter houw teruggeskoch veur e vaat beer höbbe ze inmiddels, es zoe 'n bietsje einige hei in 't land unne nuije preeens oetgeroope: Preeens Mark I. Niks hèlt die manne tege, zouw dat komme umdat zee genog boosters en shots gehad höbbe tijdens 't krutjefees of de hierezitting? Of is un adje messjien e probaat middel tege besjmetting? Veer van de gezet höbbe ns get deeper onderzeuk gedoon nao de oorsjprong van dis sjterke sjtam hei in Bemele. Um te beginne met de naam. Boe kump dæ eigelik vandaan? Us deepgaond onderzeuk begint wie altied op google. Dao komme veer Krutje al sjnel tege.

- 6. denneappel = topers, topers, topers,...
- 7. denneappel = **krutje (Brabants)**
- 8. Denneappel = **krutje (eindhovens)**

Unne denneappel dus? Dat liek os sjterk. D'r zeen in Bemele bijnao gein dennebuim te veende (behalve dae van de joonkheid dan). Es te noe gezag houws unne eikeboum, tja "eikel" dat houw netuurlik waal gekind. Krutje zou volges ander bron afkomstig zeen van Krot (onvolgroeide vrucht). Ja es te sommige van 't Krutsje zuus kinne veer us dão waal get bee veursjelle. Mer missjien ligk dat allemaal get te zier veur de hand.

Veer zeuke weijer,... wieveul weijer? Nou hiel veul weijer,... veer koame terech in Albanië boe un stedsje ligk met unne zier bekinde naam... Zouwe 't dan aafsjammelinge van Albaneze weze?

Mèr de nationale drank van Albanië is *Slivovitsj*, en die van 't Krutje houwe mie van beer,... weijer zeuke dus, of messjien korter bee...



Get korter bee, in Duitsland presies (boe ze waal van e glas beer houwe) lig 't plaetske Krut. Zouw 't zoe zeen dat zee aafsjtamme van de Pruisje?

Allein DNA onderzoek kin mier duudelikheid bringe in dis kwestie. Wèlt geer 't zeker weite dan kint geer uch DNA achterlaote bee "Le garage" in Bemele. Gewoen e bitsje ochtend... in e putsje, geer wèt waal wie dat geit...



Op us onderzeuk kaome veer trouwes waal nog mier frapante zake tege... Zoe haet 't Krutje blykbaar un eige beer merk op de mert gebrach en handele ze ouch in KRUT (Kratkussens) dat letste liek us waal handig es geer bee Le Garage veur op 't terras goot zitte aan de stehtische die dao zeen geplaats...

**KLEINTJES****Te koup aangeboje:**

Zeikvaat. Altied al eemes in de zeik wille zette? Dan is noe dien kans. Fleenk zeikvaat, zoe good es nuij. Laeg mer op verzeuk ouch vol te leveure. Kin waal eve doore want ouwe eigenaar haet neet zooveul te zeike..... te bevraoge bee Ralph Andriën...

**Gevraog:**

Uch sjtum, die höb geer met carnaval toch neet nudig, en iech kin ze good gebruuke in maart....

"Van Bemelen tot Mesch, eederein sjtump op Defesche, politicus in hart en ziel, en in eeder geval beter dan..."

Lies 11, Max Defesche



Minsj erger diech Neet....

't Weurt tegewoordig bijnao traditie... un bordsjpel in 't carnavalsgezetsje um de daag door te komme es veer met caraval neet nao boete kinne (of wille, mer dat liek os sjterk)

Tja wat moste dan, dan deiste mer un sjpelke. Nao 't Bemelse Monopolie bord (dat door de gemeente Mergraote gewoen is naogemaak,... kinnen die noe nik sself verzinne?) en veurig jaor de virtuele optoch met 't Geitebord presentere veer uch dit jaor: os "Minsj erger diech neet sjpel.

Op de ierste plaats umdat 't ouch geine zin haet diech te ergere, en op de twiede plaats gewoen umdat 't leuk is met vrun of de keender te sjpele.

Veer winse uch veul sjpeleplezer

Sjpelregels

Zoe es geer zeet is dit n low budget sjpel, geer höb geín pionnekess nudig, allein unne dobbelsjtein.

De op 't sjpeelbord aafgebeelde beerdöpkes zeen mer n veurbeeld, geer moag 't ouc'h met Heinekendöpkes sjpele es geer get minder sjmaak höb of, veur de keender, met cola of chocomeel döpkes

Regel 1

- de döpkes maoge neet mie op de flesj zitte. Dat liek us logisch. "t flesjke laeg dreenke is neet verpliech mer kump de sjpelvreugde waal ten goede. Geer gaot uch vanzelf get minder ergere...

Regel 2.

Geer höb mer drei döpkes nudig. Aanders doort 't sjpel te langk en weurt t "Minsch verveil diech neet"

Regel 3..

Gebruiik éíne dobbelsjtein (anders geit 't te sjnel) De maogs e döpké op 't bord zette es te zes goeis.

Regel 4.

Es te op e veld kumps boe un ander döpké sjteit dan maog ze dat d'r vanaaf goeije

Regel 5.

De zets eve veul plaatse es te goeis (logisch toch)

Regel 6.

De probeers d'n döpkes alledrei "binne te kriege" Degene dae dat 't iers luk haet gewonne

Regel 7 t/m ...

Welt geer 't nog interessanter/leuker make, verzin dan uch eige sjpelregels.bv: es te ein goeis moste eine dreenke, es te drei goes moste get oet doen, es te vijf goeis moste bitterballe make,... veer doen mer get suggesties...

Dit is allemaol veur eige rekening en op eige verantwoording...

Regel 10.

't is verbooije um diech te ergere.....